

娛

親

雅

言

娛親雅言卷四

歸安嚴元照

三傳

國語增

左隱六年傳善鄭以勸來者猶懼不說杜預云說至

也一切經音義兩引皆作暨

十二達磨多羅禪經又十八分別功德論

二

元照案暨及也義如論語學如不及猶恐失之

暨之爲說古文假借在莊九年經公及齊大夫盟於說公穀皆作暨左氏古文家也

又八年傳諸侯以字爲謚因以爲族元照案服子慎

云公之母弟則以長幼爲氏貴適統伯仲叔季是

也庶公子則以配字爲氏尊公族展氏臧氏是也

是服本諡作氏鄭康成本則作諡故其注儀禮

少牢

饋食

云大夫或因字爲諡春秋傳曰魯無駭卒請諡

與族公命以字爲展氏是也又禮記

檀弓上

魯哀公

誄孔子注云尼父因其字以爲之諡

左哀十六年傳正義云鄭

元錯讀左傳云以字爲諡遂復妄爲此解

服鄭兩本不同而句法則無

異若杜預乃以爲諡二字屬下爲句云卽先人之

諡稱以爲族元照竊謂服鄭說皆可通而究以服

義爲正此當以本文斷之羽父所請者氏與族也
公之問不及於諡故云問族於眾仲則眾仲之對
無緣及諡公命以字爲展氏卽以字爲氏也諸侯
之禮也氏族未嘗有二當時以爲氏者後世子孫
則以爲族如無駭子孫皆氏曰展卽成族矣似服
本較勝也杜解雖無甚謬然從其讀則不辭

陸聚左傳

附注据駁五經異義引作氏遂謂鄭本作氏核之禮注乃知其非

相五年傳旂動而鼓賈景伯以旂爲發石說文

部云

旂建大木置石其上發以機以追敵也許君受學

於賈故用其師說元照案三國志袁紹傳太祖爲發石車擊紹樓皆破魏氏春秋云以古有矢石又傳言旛動而鼓說曰旛發石也於是造發石車

見裴

松之注引

是曹操嘗用其說以制敵矣杜解云旛旃也

通帛爲之蓋今大將之麾也此說於古無徵案馬

融廣成頌旃旛森其如林旃旛竝舉杜殆緣此而

臆爲之說乎

章懷後漢書馬融傳注卽用杜解徐新田云養原案賈馬同治古文廣

成頌蓋用師說

元照案詩其會如林說文引作

旛廣成頌旛云

如林當亦用詩語未必以旛爲旃

類也新田此說與錢氏後漢書攷異合

正義亦云旛之爲旃事無所

出然例依本注不得不開爲之釋也又云發石非
旌旗之比說文載之𠂔部而以飛石解之爲不類
矣錢廣伯稷云族字亦載𠂔部而以矢鋒解之獨
非不類乎正義之辨強而無理矣○袁文襄牖閒
評用杜說以詆說文其言可勿置辯其云魏晉以
來造雲旛翔旛飛旛連旛竟以旛爲軍中飛石而
不知其誤自說文案所舉諸旛之名正可爲說文
之證

十三年傳及鄢亂次以濟遂無次釋文云木或作亂

次以濟其水元照案水經注

二十八
河水下

云汴水與夷

水亂流東出謂之淇水春秋莫敖亂次以濟淇水

是也据此則其當爲淇鄆水卽夷水鄆夷聲相近

梁曜北云淇誤爲其趙氏水經注釋
辯之後漢書南蠻傳注引亦誤其

武闢見閔二年傳正義云名之曰武其義未聞元照

案魯有僖閔見襄十一年傳杜解云僖公之門正

義云僖公之廟門也武闢殆武宮之門耳武闢僖

閔稱謂政類

丁教授云武宮重立於成公六年不
知毀於何公之世當攷

元照案或

武宮已毀而其地尙
仍舊名亦未可定

僖五年傳且虞能親於桓莊乎甚變之也服本作甚

解云變之甚元照案也古通邪此謂虞之於晉豈

能更親於桓莊乎而變之甚邪文義本無轉戾正

義乃云當謂變桓莊之族甚也

此正義申服注而失其旨者也近蘇

州嚴氏輯左傳古注以此語爲服注非也

變之若甚何以誅之且文勢

不順又改字失真繆之甚也正義錯會服意過加

扞擊蓋於左傳一意扶杜先儒成說不免曲意詆

排而於杜所闕解者亦不屑引用賈服其用心甚

偏且服先於杜乃据杜本而謂服改字尤不然矣

十五年傳此一役也秦可以霸元照案此言秦之定霸在此一役耳一役猶曰一舉承上懷德畏刑而言知不可鑿指爲何事服氏以一役爲戰韓之役似已失旨杜解云言還惠公使諸侯威服復可當

一事之功說尤迂曲

孫監察云志祖案一役卽指歸晉侯許周生云宗彥案

杜解不誤特文詞迂拙耳
臧在東云未免太迂太拙

十六年經六鷁退飛過宋都釋文云本或作鷁惠氏

棟

補注云說文引春秋傳亦作鷁或從二傳之文

左氏當不爾也元照案說文所稱春秋傳皆左氏

古文見於自序引公羊則曰公羊傳著姓以別於
古文也若穀梁則未嘗引及此所引春秋傳斷屬
左氏蓋鵠字三傳相同本無作鵠者攷說文鵠或
作鵠又引司馬相如作鵠則無从益之字

廿二年傳聲盛致志鼓儼可也杜解云儼嚴未整陳
元照案此卽曲禮毋儼言之儼說文云儼互不齊
也蓋師行擊鼓以鐸和之以鐃節之以鐃止之以
鐸通之地官鼓人不使其聲亂也比其盛也雖儼互不
齊可也故曰儼其曰儼嚴云何案嚴與晷同說文

石部 𡵓𡵓𡵓也 僂𡵓音同鄭氏曲禮注僂猶暫也 洛誥用顧畏于民

𡵓孔傳𡵓𡵓也正義云𡵓即𡵓也參差不齊之意

廣韻 二十 𡵓𡵓差也僂𡵓僂互厥義相符

廿三年傳浴薄而觀之晉語 設微薄而觀之 列女傳文

同 韋杜皆訓薄為迫元照案此帷薄之薄也不可

訓迫莊子 達生 高門縣蔣司馬彪注薄簾也微薄謂

疎簾也韋訓微為蔽亦非高誘注淮南 道應 引此事

云設薄以觀之是漢儒舊說以為帷薄矣。左傳

釋文引國語云薄簾也宋氏國語補音云今案韋

注亦訓迫無簾薄之說恐是賈唐所注

廿八年傳曲踊三百距躍三百杜云百猶勦也釋文

作勦正義作勵元照案說文

力部

勦讀若厲故勦又

作勵釋文正義異而實同百當從釋文音陌陌勦

聲相近正義從本讀恐非三百之義未詳邵氏左

鵬云蓋踊躍之度大約有此

錢先生云大昕案晏子枕尸股而哭之三

踊而出是踊以三爲節
臧在東云邵說與古台

又楚子玉自爲瓊弁玉纓服氏解誼謂馬飾

王制正義引

案西京賦駕彫軫六駿馭戴翠帽倚金較瑳弁玉

纓遺光儵爚薛綜注弁馬冠也又

毛本誤又

髦以璿玉

飾纓馬鞅

毛本誤鞭

也以玉飾之說文引左傳作璿弁

與平子賦同薛注亦與服義同服義不可易矣蓋

弁卽緜也說文

糸部

緜馬髦飾也春秋傳曰可以稱

旌緜于緜或作緜髀籀文覓

覓卽弁之正體

弁緜音義皆

同薛綜又髦之義與說文合杜解獨以弁爲弁冕

引詩會弁如星證之殆泥未之服也之文故辨一

解案爾雅

釋言

服整也未之服言未整備耳當依服

義

文十三年傳晉六卿相見於諸浮元照案相見謂行相見之禮也士相見禮曰上大夫相見以羔飾之以布四維之結于面左頭如麇執之如士相見之禮注曰上大夫卿也當時晉六卿於諸浮行此禮故云相見於諸浮若泛常覲面何日不有而云相見乎杜氏於此不著一辭正義遂云出就外野屏人私議殆近於野人之談矣

又不如隨會能賤而有恥正義引服氏云謂能處賤且又知恥元照案世祿之家鮮能處賤其能處者

率皆闖背之徒又鮮知恥隨會不然是以可貴服
氏舊說無可疑者邵氏左臙謂能字句絕能言才
也如孟子能者在職之能說非悖理然舊解無病
毋庸更張或有附會邵說者謂此能字與上能外
事相對又謂能字下屬不成句法此則鑿而無當
矣

十五年華耦來盟傳云魯人以爲敏杜云無故揚其
先祖之罪是不敏魯人以爲敏明君子所不與也
元照案杜解淡得經閒然以左氏通例求之似未

盡符上文既云貴之此不容視爲微辭也正義以魯人爲魯鈍之人尤失之鑿并非杜意

十七年傳將悉敝賦以待於儵杜云儵晉鄭之竟言欲以兵距晉許周生云儵本庸地之入於楚者見十六年傳子家言欲悉眾從楚所謂鋌而走險急何能擇也此時正晉楚爭鄭之日鄭欲從楚故晉人懼而行成耳不然鄭安能與晉抗乎

錢先生云大所案鄭

與庸相距甚遠恐
禾可合爲一地

成二年傳韓厥執縶馬前說文

馬部

云𩊖

本作𩊖隸變作𩊖非入中

也字絆馬也从馬○其足春秋傳曰韓厥執轡前讀
若輒或作繫从糸執聲元照案杜本作繫從或體
也馬字衍當据說文所引刪之前之爲言進也增
一馬字似謂齊侯之馬前矣非也

三年傳鄭賈人有將賓諸褚中以出杜氏無解元照
案以綿裘衣曰褚見漢書南蠻傳注當取此訓與

襄三十年傳褚字義別

臧莊東云鑪當謂儀禮茵著用茶著卽古褚字○

襄卅年傳取我衣冠而褚之杜訓褚爲畜元照案

一切經音義

四分律四十一

引左傳作貯呂覽

樂成

亦作貯

抱經先生云地官廛人注有儲藏字釋文云儲本

或作貯又作褚

孫監察云志祖案杜訓為畜亦有貯義藏莊東云案貯亦畜也然

古文當作褚○昭三年傳請以印為褚師疑亦主衣服

之官杜以為市官其說無徵

錢先生云大昕案以廛人注褚藏字又作

褚證之則杜以褚師為市官似可通

宋有褚師段

襄廿年

褚師子肥

哀八

年衛有褚師圖褚師子申

昭廿年

褚師定子

哀廿六年

褚

師比

即聲子哀十五年

杜皆無解

匡繆正俗

四

云襄五年楚公子王夫字子辛學者以

其字子辛遂改為壬夫同是日辰名字相配也案

楚公子午字子庚庚是十幹午是十支法有相配
或者此人以庚午歲若庚午日生故名午字子庚
耳辛壬同是十幹若以辛生不得名壬若以壬生
不得字辛此與庚午不類固當依本字不宜穿鑿
改易錢廣伯馥云石癸字甲夫白丙字乙皆同取
十幹爲名字古人未嘗無此例也顏氏此論毋乃
知其一未知其二

襄十八年傳伐雍門之款元照案古字艸木偏旁可
容通假款卽楸也楸於爾雅爲槐於說文爲梓漢

書東方朔傳萩竹籍田注云萩卽楸字又貨殖傳
山居千章之萩又滎南河濟之間千樹萩樂彥云
萩梓木也師古注云萩卽楸樹疑字也此可取以
證傳○萩蕭也見爾雅說文此萩之正訓傳旣云
伐知非蕭明矣說文繫傳於萩字下注云左傳或
借此爲楸字卽指此也

廿六年傳鄭於是不敢南面元照案鄭氏禮注曰面
猶嚮也

見夏官擇人又見禮記玉藻

封禪文回首面內亦當訓

嚮不敢南嚮言不敢事楚也楚在鄭南○說文

人部

側鄉也从人面聲少儀曰尊肅者側其鼻鄭本亦作面

廿九年傳其周德之衰乎杜云衰小也正義云衰者差也九章算術謂差分爲衰分言從大漸差而小故杜以衰爲小元照案依杜解則衰當讀楚危切釋文無音漏也若服氏解爲衰微則當如本讀然釋文固非從服者

臧在東云此條似杜注是

昭元年傳趙孟曰天乎正義云國無道而歲又饑則君或早天元照案后子言秦不亡趙孟故疑其君

當早天近本誤作天平唯唐石經不誤

又楚公子圍設服離衛杜云離陳也元照案離羅聲

相近方言

七

云離謂之羅羅謂之離郭璞注云皆

行列物也此離衛謂陳列衛士杜解合於訓詁正

義乃以離之爲陳無正訓未之攷耳。離衛當從

杜解卽指二執戈者服氏云二人執戈在前在國

居君離宮陳衛在門

杜訓離爲陳卽用服誼。服所云離宮卽指蒲宮見正義

案設服離衛乃盟時陳設非其在國時事也

二年傳四升爲豆此卽攷工記瓶人豆實三而成鬴

之豆也釋文於周禮左傳皆無音廣雅

釋器

云升四

曰豆曹憲亦無音豆當讀本字明矣顧氏

炎武

杜

解補正引毛晃曰豆當音斗後人誤作俎豆之豆
用之攷工記一獻而三酬則一豆矣豆古斗字元
照案一獻而三酬梓人之文梓人注云豆當爲斗
下文飲一豆酒注云一豆酒又聲之誤當爲斗然
則斗之爲豆聲誤耳非古字也毛氏不引旗人而
引梓人又誤讀鄭注顧氏遽取以補杜何耶

三年傳少齊有寵而少齊必繼室近本皆作少姜元

照案二年傳少姜有寵於晉侯晉侯謂之少齊杜
云爲立別號所以寵異之子大叔言其有寵故從
其別號稱之當從釋文唐石經校改顧氏金石文
字記以石經爲誤蓋未見釋文也○服氏云所以
寵異不與齊眾女等言齊國如此好女甚少据此
則少當讀本字釋文雖不從服而少齊之義杜無
別解不合亦音詩妙反與少姜一例也

七年傳我若獲沒必屬說與何忌於夫子使事之而
學禮焉正義云此時仲尼未仕不得稱爲夫子以

未仕之時爲仕後之語是即明意尊之而失事實

元照案召其大夫而屬二子於大夫此夫子乃指

大夫而非孔子若指孔子不當曰使事之矣且觀

將有達者曰孔某今其將在孔某乎孟孫固未嘗

稱孔子爲夫子也果如正義所說則傳中兩舉孔

子之名左氏盍不盡改之乎○檀弓上正義云孟

僖子將卒召其大夫云屬說與何忌於夫子以事

仲尼似以夫子屬大夫言孫監察云志祖案此是面屬大夫之詞何得云

我若獲沒必屬說與何忌於大夫乎似不如舊說

爲順錢先生云大昕案稱孔某者對大夫言之

稱夫子者劉說與何忌言之所謂夫言豈一端而已僖子欲二子以仲尼爲師弟子於師固當爾夫子矣此大夫乃孟氏家臣似不當夫子之稱鄙意亦謂當從舊解元照案秦穆公稱孟明爲夫子見文元年傳似與孟孫卿家臣相類徐新田云養原案必屬說與何忌於夫子使事之作一句讀則順矣若以夫子爲孔子則屬字似無著

十二年傳有酒如淮有肉如坻釋文云淮舊如字四瀆水也學者皆以淮坻之韻不切云淮當爲濰濰齊地水名荀吳旣非齊人不應遠舉濰水古韻緩作淮足得無勞改也正義云劉炫以爲淮坻非韻淮當作濰以規杜氏令知不然者以古之爲韻不

甚要切据詩

約疏語

儀河敦綽尙得爲韻淮坻相韻

何故不可元照案劉說固非而陸孔兩家於淮坻

爲韻不能無疑故其言多牽率淮从佳聲灘从維

聲而維亦佳聲淮灘二文未見其異音也从佳聲

者古讀如韋故帷之古文作匱

說文

釋名

水

淮韋

古韋

也韋繞揚州北盼東至海也此漢人讀淮如

韋之明徵韋坻相韻準諸古今無不諧者後人讀

淮作石乖反故疑其與坻不協而不知石乖之音

亦出一聲之轉也 顧亭林云淮字當從佳人之

佳乃得聲今本說文亦誤元照案此亦失攷淮之

本音而輕於立說者也

徐新田云養原案脂與皆据亭林說本屬一韻乃欲

改淮字从佳
眞不可解

翠被見十二年傳杜解但云以翠羽飾被而不釋被

義漢書西域傳

下

亦有翠被師古又無注羣經音

辨三

云被衣也普義切引此傳爲證元照案楚詞

九章
惜誦

被明月兮珮寶璐王逸云在背曰被釋名

衣服

帔披也披之肩背不及下也詳其語意殆後世斗

篷之屬歟帔披皆俗字

又筆路藍縷以啟山林方言七引作𠂔戴氏方言疏

證云𠂔啟古通用元照案說文𠂔在口部開也啟

在支部教也此傳訓開則作𠂔爲正疏證尙未甚

審

錢先生云此類古人通用不必過爲區別
在東云非不
古人原通然既有舊本作𠂔於

本義更合以證正字之僅存不亦可
乎左氏六古文揚子雲正識古文者

十三年傳鄭伯男也鄭仲師服子慎皆云鄭伯爵在

男服也王肅云連男言之猶言曰公侯足句辭也

杜解從王說元照案桓二年傳今晉甸侯也杜云

諸侯而在甸服者

晉語
今晉國之方偏侯也
注方大也偏偏方也乃甸內偏

方小侯也傳曰定四年傳曹爲伯甸杜云以伯爵

居甸服言小元照謂伯男文法與甸侯伯甸相類

子產言卑而貢重者甸服也其言男正所以自別

於甸如王注則與上文殊欠關照矣周語鄭伯南

也男南古通用韋注亦作男服解鄭服王三說皆

又引賈逵云男當作南謂南面之君也元照案國語注引賈侍中云南者在南服之侯伯是正義誤

以賈說爲鄭服之說矣又引或云南面君也是正義又誤以或說爲賈說矣又引鄭司農南謂子

男云云是仲師未嘗作男服解而王注亦本諸仲師而非自造者韋氏三國時人視唐人宜得其真

○毛詩鄭譜正義引賈逵以爲鄭伯爵在男畿此則不誤○正義引鄭服之說

而辨之云周禮男服在三距王城千五百鄭去京
師不容此數元照案國語注云周公雖制土中設
九服至康王而西都鎬京其後衰微土地損減服
制改易故鄭在男服錢先生云此說甚好韋注可破正義之
惑

十四年傳三數叔魚之惡不爲末減曰義也夫杜云
末薄也減輕也正義云服虔讀減爲咸下屬爲句
不爲末者不爲末槩俗作抹隱蔽之也咸曰義也言
人皆曰叔向是義元照案家語正論引此文作或曰

義注云或左傳作咸家語雖王肅偽造然在杜氏之前故所采輯猶與服合自杜解而後人相承以末減二字連用爲減罪解矣減咸古通用見惠氏禮記古義

廿五年傳季氏介其雞賈景伯云擣芥子爲末播其

翼可以全雞目淮南注人云介以芥菜塗其雞翅

杜解從賈義鄭眾云介甲也爲雞著甲呂覽注察

云介甲也作小鎧著雞頭也孫監察云呂覽淮南注並出高誘而南解

互異何也元照案許慎高誘並注淮南今本或題許或題高實則兩家溷淆此注不同卽許高之

異

正義例從本注而獨於此則是鄭說元照案史

記魯世家云季氏芥雞羽

服虔注同賈說

賈君据此為詁

義不可易凡魏晉以下鬪雞詩如芥羽張金距

應

猜羣芥粉生

王

芥羽忽猜儔

梁簡文帝

芥羽襍塵生

褚玠

翅中含芥粉

劉孝威

芥粉塹春場

庾信

數詩皆用賈服

義正義申鄭而抑賈殊不然也芥羽之法見於宋

周去非嶺外代荅○王觀國學林謂史記改介為

芥袁文甕牖閒評又謂杜預因史記改作芥字遂

有擣芥之說其說均不足辨芥之為介古字省文

廿五年傳宋元公曰唯是楸柎所以藉幹正文者諱

無及先君說文木部引作楸部薦幹部柎薦藉音皆相近云楸

部方木也元照案幹翰皆从𠂔聲古通用爾雅釋

翰幹也說文木部幹築牆耑木也檀弓上周人牆置

翬注牆柳衣也又孔子之器飾棺牆注牆之障柩

猶垣牆障家又設萑翬注萑翬棺之牆飾周禮萑

作柳釋名器服其旁曰牆似屋牆也成二年傳宋文

公卒棺有翰檜杜云翰旁飾愚謂此傳之幹即翰

檜之翰禮經所謂牆也楸部者棺底之方木所以

承榦者

薦藉皆訓承

文公之有翰檜乃僭王禮其後遂

承用之元公請無及先君殆卽指此杜云楸柎棺中苓牀也幹骸骨也幹之義不確

廿六年傳鑿而乘於他車以歸杜云鑿一足行正義云旣斲其足而云鑿知鑿是一足行也說文云鑿金聲也蓋擊金爲聲亦名鑿惠氏補注云案說文鑿讀若春秋傳曰鑿而棄它車則傳本作鑿故訓一足行若從金與斲足無涉必傳寫之譌正義攷元照案五經文字金部鑿卽正反金聲也又一

足行見春秋左氏傳知傳中鑿字非誤漢儒讀若
之字不必異文蓋一字或有數音也卽說文一書
此例屢見徐鼎臣於此致疑未通於古耳見示部
繫字下
鑿注鑿字乃傳寫之誤說文足部所無不可据以
爲正且兵刃以金爲之从金未爲無涉

廿六年傳率羣不弔之人杜云弔至也元照案弔至
釋詁文費誓無敢不弔鄭注弔猶善也詩小雅節
南山

不弔昊天傳訓爲至箋云至猶善也至有善義不
弔之人謂不善之人也顧氏杜解補正云好行禍

亂不相弔恤之人

引傳遜辨誤

說非不合然不若杜解

之近古

廿七年傳進胙者莫不謗令尹杜云進胙國中祭祀

也元照案呂覽

慎行論

載此事云動作者莫不非令

尹動作謂力役之人也疑進胙即動作之駁文動

古文作通

說文力部

與進相似又案詩

大雅蕩

侯作侯祝

傳云作祝詛也正義云作即古詛字

錢先生云大昕案楚人尚

鬼國中祭祀皆有祝詛之言杜說似長不必改從

呂書

臧在東云鋪堂案動亦進也杜說誠佳然

謂進胙即動作

之異文亦確也

定九年傳鏤其軸麻約而歸之元照案方言九其上約謂之蒚注卽輦帶也又三蒚薄也注謂薄裏也蒚猶纏也此可證傳義麻約謂以麻纏裏之也約猶束也蒚乃俗書

哀十七年傳如魚窺尾衡流而方羊裔焉大國滅之將亾賈景伯以裔焉屬上讀解裔爲水邊言衛侯將若此魚杜依賈說劉光伯云卜繇之辭文句相韻裔焉二字宜向下讀之其論允矣正義例從本注故於左傳不得不加辨駁而毛詩召南正義引汝墳

傳如魚竄尾衡流而方羊則從劉讀也元照又案古焉於同物裔焉大國言鄰於大國也光伯謂土地遠焉之大國文義晦澀宜正義以為不辭矣

廿四年傳是僊言也服氏云僞不信言也杜云僊過

也釋文云僊石快反字林作僊云夢言意不慧也

意字疑衍 賦在東云殆謂夢言之頃意不聰慧耳未可以說文疑其衍元照案說文

心部僊夢言不慧也字林即廣雅僊僊也釋說文

僊瞑言也通俗文夢言謂之僊一切經音義引內典四分

二十有僊語之文僧元應音義四云舊律本多作僊

舊二形廣韻

祭十三

云憲寐言舊同又云寐睡言憲

藝同据此則憲與寐通列子

周穆王

云眠中吟嚙呻

呼憲言猶云夢嚙語耳服杜說皆未了○說文

足部

嚙衛也與此義不符嚙嚙皆俗書當以憲為正

春秋時唯宋晉鄭三國具六卿

孫監察云志祖案魯亦備六卿

云魯有六卿未見所出魯之三卿即三家也孫

監察云志祖案魯有司徒司馬司空三桓世為之

此外尚有羽父為大宰夏父弗忌為宗伯

臧孫紇為司寇俱見左傳則備六卿矣

宋之六卿左師右師司徒司馬

亦稱司武見司寇司城

即空宋以武公故是也此據文七年十六年昭其始

廢司空為司城是也廿二年哀廿六年傳

也官不備以一人而攝兩卿如公子目夷爲左師

僖九年又爲司馬僖十年之類大司徒大司馬傳亦從

省不悉稱大孔父嘉公子目夷公子卬三人爲大

司馬亦曰司馬隱三年傳召大司馬孔父而屬殤公桓二年傳孔父嘉爲司馬僖十年

九年傳司馬子魚曰廿二年傳大司馬固諫文七年傳樂豫舍司馬以讓公子卬八年傳殺大司馬

公子華定爲司徒出奔邊卬代之而昭廿二年傳

云邊卬爲大司徒此可以互證少司馬之官華軀

曾爲之見昭廿一年其時軀父費遂爲大司馬亦稱

司馬自軀之後少司馬不復見公孫忌代費遂爲大

司馬廿二年傳不聞有代疆者哀廿六年傳皇非我爲

大司馬時亦無少司馬也少司寇之官始見戒十

五年傳向爲人爲大司寇鱗朱爲少司寇其後華

慆亦爲少司寇昭廿年及樂輓昭廿二年樂朱鉏哀廿六年爲

大司寇時又不復有少司寇蓋六卿之貳亦時立

時廢者至大宰之官殆又居六卿之外者華督之

後唯成十五年向帶爲大宰魚府爲少宰後亦不

復見孫監察云志祖案襄十七年傳皇國父爲大宰又襄九年傳使西鉏吾庀府守杜注鉏吾

也大宰則二宰亦非常建者孫監察云志祖案列子仲尼篇韓非說林俱有

商大宰是孔子時猶有此官非不常建也 元又
照案商大宰蕩問仁於孔子見莊子天運篇

案宋其公時華元爲右師魚石爲左師蕩澤爲司
馬華喜爲司徒公孫師爲司城向爲人爲大司寇
鱗朱爲少司寇向帶爲大宰魚府爲少宰此時居
卿位者九人臧在東云未必九人皆卿亦屬一時建置如此非
成例也

外傳周語上昔我先王世后稷以服事虞夏韋注后
君也稷官也父子相與曰世謂奔與不甯元照案
注意謂先王世世爲稷官也與史記周本紀文同

南宋刻本脫去王字學者讀先世后稷疑是專屬

於奔則以字文義既不屬而注語皆成鈎棘矣

抱經

先生云左成十六年傳正義所引有王字

又攷武成正義云后稷非王

尊其祖故稱先王周語云昔我先王后稷又曰我

先王不窋据書疏所引則唐本有脫世字者而王

字未嘗脫也

徐新田云養原案國語前云昔我先王世后稷不知先王爲何人故注云

父子相繼曰世謂奔與不窋後云我先王不窋則既知其人矣故注云周之禘祫文武不先不窋故

通謂之王明不窋所以得稱先王之意又云商頌亦以契爲元王是稷亦可稱王明上文所謂先王

通指奔與不窋韋氏兩注自相發明益見王字當補或因韋注於後始釋先王疑前文不合有王字

者第弗

淡取耳

又

下

聽無聾注不聾耳而聽元照案方言六聾聾聾

也生而聾陳楚江淮之間謂之聾荆揚之間及山

之東西雙聾謂之聾廣雅

釋詁三

聾聾也聽無聾言

其聰也聽言而若罔聞躁妄之人也故下云聽無

聾成也注成定也不當作聾耳解

徐新田云養原索聾說文作聾

與方言

訓同

又

下

及定王王室遂卑注定王頃王之子靈王祖父

而言及定王王室遂卑非也定當爲貞貞王名介

敬王子也元照案貞王本謚貞定見漢書古今人表上下國語史記皆從省稱定王亦猶衛獻聖武公之稱武公公叔貞惠文子之稱文子也貞定王乃靈王元孫○史記索隱周本紀謂貞定王之稱出自皇甫謐蓋未檢漢書也

晉語一雖蝎譖焉避之不若戰元照案方言七蝎噬

逮也蝎噬卽爾雅之遏釋言古文偏旁通借耳又

二陷於大難乃逮於讒蝎譖卽逮讒之義韋注訓

蝎爲木蟲從本字爲訓似失之矣

又簦笠相望於艾陵注唐尚書云簦夫須也元照案

簦不當訓艸名詩

小雅都人士

臺笠緇撮爾雅

釋

臺夫

須唐尚書本殆作臺笠與毛詩同故以夫須解之

臺說文从艸臺笠形近而誤韋氏不辨別字體而

謂唐以夫須訓簦非也

梁曜北云所見國語及宋氏補音皆作臺何也元

照案簦字說文艸部所無竹部有簦字云笠也韋云簦笠備雨器也則自當从竹近時翻刊宋明道

本國語

从竹

吳語命圭有命不曰吳伯而曰吳王注吳本稱伯故

曰吳伯史記索隱

吳世家

据之以爲吳本伯爵元照

案吳本子爵春秋經從無吳伯之稱今据國語而
以爲本伯爵是春秋不足信也蓋吳之稱王歷世
已久黃池之會正當憤盈之際晉方懼吳若遽指
其實慮增其怒故易其辭以相入冀其降心以相
從也下又云君若無舉天子以干其不祥而曰吳

公吳伯吳公皆一時權宜之詞而韋仞以爲實然

誤矣

錢先生云公羊傳云春秋伯子男一也鄭本

伯爵而子產云鄭伯男此自卑之稱吳本子

爵而云吳伯此尊之之稱皆合於公羊之義徐

新田云養原案伯者長也天子命吳爲諸侯長不

命吳爲王也此

說未知可否

公羊隱四年傳吾爲子口隱矣隱曰吾不反也何邵

公曰口猶口語相發動也元照案口疑卽訃之省

文說文

言部

訃扣也如求婦先訃發之何云發動與

訃發義近

七年傳母弟稱弟母兄稱兄邵公曰母弟同母弟母

兄同母兄左宣十七年傳凡稱弟皆母弟也杜預

云庶弟不得稱母弟元照案二傳之所謂稱者指

春秋之書法非指其家庭稱謂也

錢先生云此說至確春秋書陳

侯之弟招素伯之弟鍼宋公之弟辰衛侯之兄繁皆同母兄弟也齊侯使其弟年鄭伯使其弟語亦

是此例號之會書陳公子招不云陳侯之弟者諸侯之大夫具在不當殊之也又云二傳云曹無

大夫吳無君無大夫皆謂春秋書法無春秋書法特書者耳豈有列國而無君大夫者乎春秋書法

凡稱兄弟者皆其母弟母兄否則書曰公子蓋有

母弟而稱公子者矣未有非母弟而稱弟者杜預

所謂庶弟不得稱母弟而母弟或稱公子是也若

夫家庭之內自相稱謂適子之於庶兄弟不稱曰

兄弟又將安稱徐新田云養原案詩云人之無良我以爲兄公子頑惠公之庶兄也

桓十六年傳屬負茲邵公云諸侯有疾稱負茲元照

案金縢如有丕子之責于天鄭注讀丕爲不史記

周公世家作負子白虎通云諸侯曰負子負子者諸侯

子民今不復子之也

御覽七百三十九引

禮記音義隱云諸

侯曰不茲不丕負聲相近茲子亦相似皆通用此

古義郭璞注爾雅蓐謂之茲

釋器

引此傳以茲爲蓐

以負爲背負說已近俗此疏乃謂負事繇多尤失

之矣

文七年傳眅晉大夫使與公盟也邵公云以目通指

曰眅元照案指謂意指也字本作指說文

心部指意

也假借从手以目通指謂目動以示意也儀禮疏

云通指通其揖意是也又僖二年傳獻公揖而進之邵公曰以手通指曰揖與此傳同疏云言其用目眊之而并指向魯則誤解作手指矣

許子詠云宗彥案疏

亦不誤古人措詞少晦耳

宣六年傳靈公望見趙盾愬而再拜邵公曰愬者驚貌釋文有所革訴路二音元照案如何解當讀所革反愚謂愬義如詩遡其過澗之遡遡鄉也

毛國傳

策衛君跣行告遡於魏注云愬同此愬遡相通之證靈公不欲盾有所言故望見其來先迎而拜之

以關其口蓋巧於拒諫如此趙盾逡巡再拜而出

逡巡退辟也釋文下一音未爲不允

臧在東云慙邇誠通而訓

驚義迎與望見意複也精思之何如

孫監

察云志祖案先望見而後迎之未見意複

十二年傳不赦不詳吾以不詳道民災及吾身何日

之有邵公曰善用心曰詳韓詩外傳六春秋繁露

王皆作祥元照案古詳祥通用

見惠氏公羊古義

左成十

六年傳德刑詳義禮信从言儀禮

士相見禮

忠信慈祥

从示一也漢人皆訓善蓋詳祥皆从羊聲善本作

善从言从羊義類本相近耳善用心猶曰以善存

心也

黃氏日抄

卅一

論公羊襄廿九年傳云爾殺吾兄之語

非也僚乃札兄之子光殺僚非殺札之兄也元照
案以僚爲餘昧之子史記之說公羊則以僚爲札
之庶兄說本不同傳云謁也餘祭也夷末也與季
子同母者四又云僚者長庶也以札有庶兄在故
特叙同母者四人而指僚爲長庶服虔解左傳云
僚者夷昧之庶兄高誘注呂覽忠廉云閼廬纂庶父
僚而卽位皆用公羊說黃氏專据史記以議公羊

未浹攷耳

昭五年經叔弓帥師敗莒師於濇泉傳曰濇泉者何

直泉也直泉者涌泉也元照案爾雅

釋水

濇泉正出

正出涌出也此傳之濇泉與詩之檻泉卽濇泉也

蓋其地有濇泉因以名其地如齊有梧邱營邱魯

有咸邱宋有蔡邱陳有宛邱皆因有是邱而因以

爲名者也漢梁國碭縣因山出文石而名其縣爲

碭亦此例也

見漢書地理志注

邵公乃云蓋戰而涌爲異

又云百姓悲怨歎息氣逆之所致殆無稽之言也

徐新田云養原案邵公之說劉原父已辯之矣劉氏曰公羊曰潰泉者直泉也非也此地名耳豈謂戰而泉涌乎案戰而泉涌自是邵公之說劉氏乃併傳非之蓋不知傳之直泉是釋地名非論本事也

昭廿四年傳昭公將弑季氏告子家駒曰吾欲弑之何如元照案以君殺臣而曰弑猶左氏之王貳于

虢王叛王孫蘇字法相類古人美惡輕重不嫌同

辭讀者不可以辭害志也洪景廬

容齋三筆十四

王伯厚

困學紀聞

執貳叛二字詆斥左氏其論誠正然未明乎

古人用字之法不免冤古人矣邵公亦未知此意

強爲之說曰昭公素畏季氏意者以爲如人君故言弑斯則穿鑿無理不可以訓

穀梁隱五年傳苞人民毆牛馬曰侵范甯云制其人

民以制訓苞未詳所本唐石經初刻作包後增艸

頭元照案當以初刻爲正鄭注周易云包取一作聚

也繫辭包儀氏漢書叙傳下包漢舉信劉德云包取也

又通抱抱卽掇之或體見說文徐鼎臣云今作薄報切以爲襲襲字非是

爾雅釋掇今本聚也說文掇引取玉篇引也周易

釋文謙云哀鄭荀董蜀才作掇云取也

九年傳震雷也電霆也楊士勛疏云霆者霹靂之別
名有霆必有電故傳云電霆也或當電霆爲一也

楊說尙疑而未定元照案易繫辭鼓之以雷霆釋

文引蜀才云凝

盧校改疑

爲電莊子

天運

吾驚之以雷霆

釋文云霆徒佞也電也淮南

兵略

疾霆不及掩目夏

侯湛雷賦掣丹霆之皓

李暉雷賦起偉霆於霄

際

俱見初學記

此皆以霆爲電與傳義符霆電聲相近

故可轉以相訓非止疾雷一訓也陸佃埤雅云霆

音廷則爲雷音蜓則爲電愚謂四聲之別古人所

無母庸過爲區別也

九年經天王使南季來聘傳曰南氏姓也日知錄

廿七

云南非姓姓字衍文元照案范甯云南季天子之上大夫氏以爲姓也所以別姓者經有王季子來聘祭伯來王祭皆非姓也据此則范不以姓字爲衍又案莊元年夫人孫于齊傳曰不言氏姓貶之也僖八年傳言夫人必以其氏姓名言夫人而不以氏姓非夫人也氏姓連文穀梁屢見不可以爲衍文又案士昏禮祝告稱婦之姓曰某氏來歸又

在穀梁前矣日知錄禹貢雖指極論姓氏之別謂
涸姓氏爲一者始於史記殆非也

莊七年星隕如雨傳云其隕也如雨元照案如雨之
義二傳與左氏異左氏云與雨偕也故杜預以而
訓如公羊云如雨者何如雨者非雨也何邵公云
明其狀似雨爾穀梁義與公羊同而范氏亦訓如
爲而失其旨矣下文云著於上見於下謂之雨案
文三年雨螽于宋傳亦云著於上見於下謂之雨
蓋可證此傳之義與公羊合○論衡

說日云辛卯之

夜賞星若雨而非雨也亦用二傳之說

卅一年傳獻戎捷軍獲曰捷戎菽也范云菽豆元照

案爾雅

釋州

戎菽謂之荏菽孫叔然云大豆也毛詩

傳

大雅生民

荏菽戎菽也箋云戎菽大豆也此傳戎菽

二字當連讀戎大釋詁文也穀梁釋文云戎捷戎

菽也捷獲也楊疏云案管子云出戎菽及冬蔥布

之天下則以戎爲豆也

案管子亦當以戎菽連讀

陸楊皆以戎

字句絕恐失其讀矣

孫監察云志祖案戎菽或可單稱戎故經文但稱戎捷而

傳以菽解之此說似泥

元照案因伐山戎所得

故經曰戎捷僖廿一年經楚人使宜申來獻捷傳

曰捷軍得也其不曰宋捷何也范云据莊三十一年齊侯來獻戎捷据此則范不以戎爲蔽明甚疏自失
攷耳

僖十九年傳梁亾鄭弇其師我無加損焉正名而已
矣元照案此殆引孔子之言也論語必也正名乎
鄭注正名謂正書字也古者曰名今世曰字聘禮
記曰百名已上書於策孔子見時教不行故欲正
其文字之誤此傳正名義亦如是蓋不言秦人滅
梁而曰梁亾不言鄭高克奔陳而曰鄭弇其師恐
後人疑不因魯史之舊文而有加損於其間矣故

特發此論

卅三年傳匹馬倚輪無反者范云倚輪一隻之輪

公羊

作隻邵公云隻跨也

唐石經初刻作奇後增一旁元照案奇

倚一也說卦傳參天兩地而倚數蜀才作奇

見釋文

周禮注引作奇荀子

儒效

倚物怪變楊注倚奇也韓

詩外傳

五

作奇物怪變又

脩身

倚魁之行楊注倚奇

也奇讀爲奇偶之奇莊子曰南方有倚人曰黃繚

也今本莊子

大宗師

作畸方言

二

倚跨奇也自闕而

西秦晉之間凡全物而體不具謂之倚梁楚之間

謂之踦○漢書五行志 又作觥亦同

宣二年傳靈公朝諸大夫而暴彈之范云暴殘暴元

照案荀子

富

暴暴如邛山楊注暴暴卒起之貌呂

覽

察

擁水暴湍高注暴卒也大戴禮

保

何殷周有

道之長而素無道之暴也盧注暴卒疾也曲禮上

已孤暴貴史記

項羽本紀

何興之暴也說文

日

暴疾有

所趨也廣雅

釋詁

暴猝也暴彈乘其不備而猝然

彈之也范解未允

定十五年經戊午日下稷范云稷下吳謂晡時

詳惠氏周

易古義

左氏公羊皆作吳元照案史記天官書云旦

至食爲麥食至日昃爲稷昃至餽爲黍餽至下餽

爲菽下餽至日入爲麻據此則稷依本字訓之較

爲近古

臧在東云天官書之傳流遠矣引以注穀梁最合也

昌歎見左僖卅年傳杜云昌歎昌蒲菹正義云齊有

邠歎魯有公甫歎其音爲觸說文云歎盛氣怒也

從欠蜀聲此昌歎之音相傳爲在感反不知其字

與彼爲同爲異獨檢書傳昌蒲之草無此別名未

知其所由也日知錄

四

云玉篇有歎字徂敢切昌

蒲葅然則傳之昌歆正合此字而唐人已誤作歆

元照案歆字之義與傳誠不符然依玉篇定爲歆

恐亦非也說文歆歆歆也

歆心有所惡若吐也

歆之俗體作

嗽

亦見說文○
龜就聲相近

歆歆之義俱非昌蒲若云借用亦

無所取元照竊疑字當爲歆書呂刑剗取桮黔桮

今文作剗

見正義

古文作歆

說文支部

鄭氏注周官

天官醢人

云昌本昌蒲根切之四寸爲葅元照謂切之用刀

故云歆較歆歆二文義差近之未知允否

唐石經公穀二傳不分析經傳與左氏不同而穀梁

離析經文又閒異於公羊明監本汲古閣本錯亂

顛倒當据石經校正莊七年恆星不見下接傳文

恆星者經星也

云

夜中星隕如雨下接傳文其

隕也如雨

云

今本經中不見下有夜中星隕如

雨六字非也

此處唐石已殘闕据宋本注疏如此
明人補刻石經與今本同不足据

又廿五年六月辛未朔日有食之下接傳文言日

言朔食正朔也鼓用牲于社下接鼓禮也

云

今

本誤以鼓用牲于社列於言日言朔之上則經傳

倒置矣僖元年夫人姜氏薨于夷下接傳文夫人

夢不地地故也齊人以歸下接傳文不言以喪歸

云

云今本以齊人以歸誤置於夫人夢不地之上

又廿一年公會諸侯盟于薄下接傳文會者外爲

主焉爾釋宋公下接傳文外釋不志

云

云今本釋

宋公置於會者外爲主之上宣八年壬午猶釋下

接傳文猶者可以已之辭也

云

云其下萬入去籥

四字經文也今本猶釋之下誤有萬入去籥四字

則衍文也又十八年歸父還自晉下接傳文還者

事未畢也

云

云其下至檉遂奔齊經文也遂繼事

也傳文也今本歸父還自晉下誤衍至裡遂奔齊

五字成七年饑鼠食郊牛角下接傳文不言日急

辭也

云

云改卜牛饑鼠又食其角下接傳文又有

繼之辭也

云

云乃免牛下接傳文乃者亾乎人之

辭也

云

云今本於食郊牛角下誤衍改卜牛云云

十一字昭廿三年胡子髡沈子逞滅下接傳文中

國不言敗

云

云獲陳夏齧下接傳文獲者非與之

辭也

云

云今本滅字下誤衍獲陳夏齧四字又廿

五年公孫于齊下接孫之爲言

云

云次于陽州下

接傳文次止也今本次于陽州誤置公孫于齊之

下

此處唐石殘闕明補者亦與今本同

定十一年宋公之弟辰下接

傳文未失其弟也又及仲佗石彊公子地下接傳

文以尊及卑也又自陳下接傳文陳有奉鬻爾又

入于蕭以叛下接傳文入者內弗受也

云

今本

先綜舉經文於上而不知自宋公之弟以下廿字

盡衍文也哀二年取潞東田下接傳文潞東未盡

也又及沂西田下接傳文沂西未盡也今本於帥

師伐邾下誤衍取潞東田及沂西田八字以上十

一條宋時監本附音注疏皆與石經同唯明人補刻石經則與今本同不足据也

開成石經乾符時重加修改文字或增或刪皆就碑磨治碑每行十字其或縮而爲九溢而爲十一者皆修改時有增刪也其字迹未盡泯滅細審可以得之大拓改刻不如初刻之可信穀梁磨改處甚多未有爲之申明者不可不盡心焉桓五年螽蟴蟲災也又僖十五年八月螽蟴蟲災也此二處初刻皆不重螽字磨改增入案隱五年九月螟傳曰

蟲災也並不重螟字此傳文法最整齊畫一當援
以爲例磨增兩蝨字皆當刪也莊七年星隕如雨
傳云中之幾也而曰夜中事著焉爾初刻有事字
後磨去案疏云幾微也中微難知而曰夜中者是
事之著見焉爾据此則事字當有又案注云中微
難知而曰夜中自以實著爾自恐事之譌又十七
年鄭詹鄭之佞人也初刻無鄭之二字僖二年惡
公子友之給初刻有友字案下文三稱公子友此
字不應刪又十二年管仲死楚人伐江滅黃初刻

如此後磨改以人字爲楚字下體文十一年經叔仲彭生會晉卻缺于承匡初刻有仲字磨改去之案左傳叔彭生釋文云本或作叔仲彭生仲字衍据此則仲字非是或穀梁舊本與左氏異亦未可定昭七年君子不奪人名不奪人親之所名重其所以來也王父名子也此處磨改共五行初刻大異不能盡得其可知者君子不奪人名之下有不奪人名者一句此數條初刻皆唐時舊本自改刻之後久已泯沒矣甚可惜也

娛親雅言卷五

歸安嚴元照

論語 孝經 孟子

學而賢賢易色孔云言以好色之心好賢則善也朱

子集註從之元照案漢書李尋傳引此文師古注

云賢賢尊尚賢人易色輕略於色不貴之也讀易

為以鼓反賢賢易色兩事對舉視孔說較勝

梁曜北云

此章每句皆一事何獨此四字兩事對舉乎周
信之云顏說至當若以為每句皆一事則與朋友
交言而有信何獨兩句為一事乎徐新
田云養原案四字即作兩句亦無不可

○又攷

之皇侃義疏云人能改易好色之心以好於賢則此人便是賢於賢者故云賢賢易色也然云賢於賢者亦是獎勸之辭也又一通云上賢字猶尊重也下賢字謂賢人也言若欲尊重此賢人則當改易其平常之色更起莊敬之容也集註參用此二說

木若貧而樂富而好禮者皇疏本樂下有道字

唐石經無

道字宋人增刻於菊

元照案鄭注云樂謂志於道不以貧賤

爲憂苦也是鄭本無道字孔本有道字故兩言貧

而樂道兩家本不同

孫監祭云孔鄭兩本不同此說極是文選舊唐書詩樂

道間居陸機漢高祖功臣頌平陽樂道注引論語

有道字謝朓荅靈運詩復禮媿貧樂竟陵王行狀

貴而好禮注引論語無道字

蓋李善兼采孔鄭兩本也何晏不審異同之故

竝存兩說失之疎略皇本雖有道字而疏中舉貧

樂富禮爲言又云貧者多憂而不樂故以樂爲勝

其說似又未嘗有道字也愚謂坊記曰貧而好樂

富而好禮與論語文同漢書王莽傳

上陳崇奏莽

功德引論語無道字

後漢書東平王傳論引亦無

此鄭君所本

史記仲尼弟子列傳云不如貧而樂道富而好禮

史公親從安國問故与孔本同

爲政父母唯其疾之憂馬融注言孝子不妄爲非唯

有疾病然後使父母憂耳元照案淮南

說

憂父之

疾者子高誘注云論語曰父母唯其疾之憂故曰

憂之者子此以憂父母之疾爲說則其讀父母二

字自爲句不以屬下視馬注較淺然自當竝存

有酒食先生饌馬云饌飲食也鄭本從魯作餽云食

餘曰餽惠氏古義云儀禮注古文簋皆作餽說文

簋具食也或作饌从巽則餽爲古文饌也臧在東

云鄭以食餘訓餽則固未嘗以餽爲古文饌也惠氏牽合爲一非矣或疑先生不宐食人之餽許周生云曲禮餽餘不祭父不祭子夫不祭妻注云食人之餘曰餽餽而不祭唯此類也食尊者之餘則祭句盛之正義云父得食子餘者熊氏云謂年老致仕傳家事於子孫子孫有賓客之事故父得餽其子餘讀此節注疏知先生亦有食子弟餽之時鄭注未容輕議

子曰書云孝于

今作乎此從漢石經

惟孝友于兄弟施於有政

是亦爲政奚其爲爲政古文尙書割截此文入之
周書君陳篇以惟孝屬下爲句近人辨之詳矣惟
是唐以後人以是亦爲政兩語爲孔子語則与皇
氏義疏不合案疏曰云子曰云云者此以上竝尙
書文也又曰云奚其爲爲政者此是孔子正荅於
或人也則是亦爲政皇氏亦以爲尙書文後人祇
緣古文君陳有克施有政四字而無下語故分析
兩語一屬尙書一屬孔子耳然皇氏已及見古文
尙書而獨以兩語皆屬尙書者何也蓋因包咸注

也包氏曰施行也所行有政道卽是與爲政同耳
詳釋注義則兩語自不可分屬故皇疏云然元照
竊意是亦爲政若非尙書則施於有政亦非尙書
攷尙書於皆作于錢先生云唐石經惟金縢孝于
有三於字酒誥有兩於字友于未嘗作於而施於有政字獨作於此非尙書
之明徵也以施於有政屬之孔子則是亦奚其文
勢回環無滯矣固不必因僞君陳有克施有政一
語而致疑也

馬融注八佾篇巧笑倩兮三句云此上一二句在衛風

碩人之二章其下一句逸也王氏

質

詩總聞云子

夏舉此詩多素以爲絢兮一句恐是他詩亦有巧
笑美目兩句而繼以素以爲絢今不存也孔子子
夏問荅與此詩不類強合此詩恐涉牽強元照案
王說是也三百篇中如此類者多矣召南草蟲首
章首四句與小雅出車五章首四句同王風揚之
水兩章首二句與鄭風揚之水兩章首二句同小
雅北山首章首四句與小雅杖杜三章首四句同
餘如習習谷風以陰以雨習習谷風維風及雨大

同小異者尙難悉數然則此三句之非出於碩人

詩也又何疑乎

徐新田云養原案碩人四章章七句必無第二章獨多一句之理此

不待辯而明前人恐亦有道及者論語所引三句皆指繪事言之與碩人詩直詠人者不同而

後人乃有篇中刪章章中刪句句中刪字之論可

謂俛之甚者。又案詩中如王事靡盬之類屢見

者尤多左襄廿一年傳叔向引詩優哉遊哉聊以

卒歲亦唯優哉遊哉四字与小雅采芣文同耳而

杜預竟以采芣當之亦非也

管氏有三歸包咸云三歸娶三姓女婦人謂嫁曰歸

集註云三歸臺名事見說苑元照案晏子春秋

內篇

雜下昔吾先君桓公有管仲恤勞齊國身老賞之以

三歸澤及子孫今夫子亦相寡人欲爲夫子三歸

澤及子孫豈不可哉又韓非子

外儲說左下

管仲相齊

曰臣貴矣然而臣貧桓公曰使子有三歸之家史

記

禮書

管仲之家兼備三歸漢書

公孫宏傳

管仲相齊有

三歸侈擬於君論衡

感類

反玷三歸諸侯之禮此皆

包氏所本三歸之非臺名審矣說苑

善說

所謂管仲

築三歸之臺以自傷於民者蓋築臺以處三姓之

女也朱子殆認作章華之臺一例文法故以爲臺名耳

不患莫己知求爲可知也也氏云求善道而學行之則人知己也皇疏云若欲得人見知唯當先學才伎使足人知故云求爲可知也此說無可疵議謝顯道云此論猶有求位求可知之道在至論則不然難用而莫我知斯我貴矣謝氏發論甚高然非此經之旨轉覺失之支離洪景廬又云不以莫己知爲患而以求爲可知爲患第四句蓋承上文言

之夫求之有道若汲汲然求爲可知則亦無所不
至矣元照案求爲可知非求爲人知也求爲可知
以待人知斯其道然後得行故謂門弟子曰居則
曰莫我知也如或知爾則何以哉聖門之學未嘗
不欲人知豈若畸人隘士之心唯恐人知者乎經
意言當求有可知之實而不當以莫知爲患正恐
學者純驚虛聲不求實際固非教人求知也又何
慮乎無所不至哉

錢先生云宋儒往往有此等議論自謂有補於聖賢其實過高

而無當也

公冶長吾斯之未能信孔門弟子師前稱吾唯此一

見丁小雅教授云漆彫子本名啟漢書古今人表

上下蒧文志自注

儒

可證仲尼弟子列傳漆彫開字

子開史公避景帝諱也

說見王氏蒧文志攷證閻氏四書釋地三續

啟

亦作启启与吾形近傳譌耳元照案說文

部

启開

也又

部

啟教也古人名字相配漆彫子漢景帝之

名皆是启而非啟启誤爲吾其理極確

匡繆正俗下云夫子之言性與天道不可得而聞已

矣蓋言夫子言性命之事及言天道不可得而聞

之近代學者乃謂夫子之言語性情竝與天道合所以不可得而聞離文析句背經違理大爲紕繆

漢書外戚傳注亦辨之

元照案皇疏云夫子之性與天地元

亨之道合其德致此渙遠非凡人所知故其言不可得聞也此義與顏氏所斥之說大致相同顏氏謂其紕繆當矣史記孔子世家云夫子言天道與性命弗可得聞也已漢書張禹傳云性與天道自子貢之屬不得聞證之史漢義益顯明顏氏惜未公及引之也

昌黎知名箴云勿病無聞病其熠熠昔者子路惟恐有聞赫然千載德譽愈尊元照案以惟恐有聞作

瞽聞解古無此訓唐儒已喜立異故論語筆解多翻舊說臧在東云啖趙說春秋亦爾此卽開劉原父一派然筆解不載此

章朱子謂筆解爲非昌黎本眞是也許周生云宗彥案筆解本

李習之所作而昌黎評之者今書中尙存昌黎評語數則可證又案張水部弔退之詩云論語未迄注手蹟今微茫可證退之於論語無成書徐新田云養原案昌黎自有論語注十卷張詩所云者指此韓文攷異云筆解已逸無復眞本

晏平仲善與人交久而敬之皇疏本作久而人敬之

故疏云此善交之驗也凡人交易絕而平仲交久而人愈敬之也邢疏本無人字故云凡人輕交易絕平仲則久而愈敬所以爲善元照案集解不載舊注不知漢儒之說云何周禮大宰以八統詔王馭萬民二曰敬故注云敬故不慢舊也晏平仲久而敬之据此則鄭本當無人字又案漢元儒先生婁壽碑善與人交久而能敬隸釋亦與鄭合愚謂平仲身爲齊卿素著才望人之敬之不足以見其善交也唐石經亦無人字

必有忠信如某者焉不如某之好學也釋文云焉如
字衛瓘於虔反爲下句首義疏載衛解云所以不
能忠信如某者由不能好學如某耳苟能好學則
其忠信可使如某也邢疏云衛瓘讀焉於虔切爲
下句首焉猶安也言十室之邑雖小必有忠信如
我者也安不如我之好學言亦不如我之好學也
此邢昺發明衛解之文余氏古經解鈎沈載之元
非也衛解載於義疏義疏新出余氏未及見耳
照案焉發語辭也衛氏句讀不同而其義無異於
皇邢兩疏宋人誤會其意謂焉是反辭言焉見十

室之邑不有如我之好學者哉

見野客叢書

全失衛民

之意

仲尼弟子列傳云仲弓父賤人孔子曰犁牛之子

云

云元照案賤人指其家世寒微而不係乎其人之

賢否後漢八稱黃憲為牛醫兒乃所謂父賤人也

楚卻宛自稱賤人

見左昭廿七年傳

其官卑也廉頗謂藺

相如素賤人

見史記廉藺列傳

以相如初為宦者令舍人

也漢書

樊鄴夏侯灌傳靳周傳贊

云仲尼稱犁牛之子騂且角

雖欲不用山川其舍諸言士不繫於垂類也合攷

史漢之文則賤人指家世而不指品詣明矣王肅
撰家語謂仲弓生於不肖之父鑿空誣罔莫此爲
甚何晏注論語亦云父雖不善不害於其子之美
其諸爲王肅之所惑歟

述而不作信而好古自來皆以爲孔子自言元照案
漢博陵太守孔彪碑云述而不作彭祖賦詩

隸釋九

是以此二語爲老彭之言蓋漢時有此說耳然以
之爲詩甚奇

錢先生云作
与古諧韵

自行束脩以上吾未嘗無誨焉後漢書延篤傳吾自

束脩以來章懷注束脩謂束帶脩飭鄭元注論語

曰謂年十五以上也元照案古者十五而入大學

人自十五以上不可以無教故聖人云爾漢人多

用束脩義與鄭注相類然非謂年十五以上者名

束脩如七年曰悼十年曰幼之例也大約謂年十

五以上乃束脩之時爾漢書王莽傳上安漢公自

初束脩師古注束脩謂初學官之時据兩漢書注

則束脩非十五歲之名明矣鹽鐵論貧富余結髮束

脩年十三得宿衛此言結髮入學官年十三而得

宿衛束脩非十五歲之名又明矣漢謁者景君墓

表惟君束脩行知□□

隸釋六

幽州刺史朱龜碑仁

義成於束脩孝弟根其本性

十相府小史夏堪碑

□□束脩操絜冰雪

二十

金恭碑束脩聰□

三十冀州

從事郭君碑束脩勤恪

隸續十九

彌衡顏子碑在束脩

之齒入宣尼之室

藝文類聚二十

厯觀諸碑則漢人之解

束脩皆與鄭同行者行年也孔氏注雖無明文然

亦未必如皇疏脩脯之解也

梁曜北云天祿識餘引束脩有五條

新田云識餘引祇四條

君娶於吳句爲同姓謂之吳孟子釋文爲于僞反皇
疏云禮稱婦人皆稱國及姓猶如齊姜秦嬴之屬
也魯之娶吳當謂爲吳姬而昭公爲吳是同姓故
諱不得言吳姬而謂吳孟子也集註於爲字偶漏
其音讀者竟依本音屬上爲句誤矣

子罕大哉孔子博學而無所成名鄭注美孔子博學
道藝不成一名而已元照案無所成名正以美其
大非惜之也皇疏云孔子廣學道藝周徧不可一
一而稱故云無所成名也猶如堯德蕩蕩民無能

名也江熙曰言其彌貫六流不可以一藝取名也故曰大也疏說確當注云而已已止也

了罕固天縱之將聖又多能也近讀以將聖屬上爲

句風俗通義

通

云論語固天縱之莫盛於聖於之

字斷句全氏

祖望

經史荅問錄稱其句讀之善元

照案晉書儒林傳序云夫子將聖多能自天攸縱

大唐新語

十一載

開元二十七年詔云所謂自天

攸縱將聖多能是唐以前句法皆然○孔注以將

爲大論衡

知實

以將爲且

皆本爾雅

細審句法皆未必以

將聖上屬

鄉黨入公門鞠躬如也孔云歛身也釋文無音元案

儀禮

聘禮記

注云孔子之執圭鞠躬

釋文云本亦作躬

如也

鞠之正文从走說文

部

鞠窮也三蒼鞠窮敬畏貌

廣雅

訓釋

鞠窮謹敬也

曹憲音鞠邱六反鞠邱弓反

爾雅

釋

鞠窮

也鞠鞠皆与鞠聲近通借躬乃窮之省文鞠窮

皆後世增益之字鞠窮複語與踧踖相同

張清儀禮識誤

之皆所以狀敬謹之意史記

韓長孺傳贊

云壺遂之內

廣行脩斯鞠躬君子也

魯世家鞠躬如畏然徐廣云鞠窮謹敬兒見三蒼音

窮此言敬慎之君子豈曰曲身之君子哉史公親受業於

孔君而此與論語注異論語注非真孔本近人辯之詳矣又案鹽鐵論利云衰

衣博帶竊周公之服也鞠躬跼跼仲尼之容也

後漢書儒林傳論云鞠躬昏主之下狼狽折札之

命以鞠躬與跼跼狼狽為對文知亦不作曲身解

也設如孔解則不得云如矣聘禮記鞠躬焉如恐

失之魏氏了翁儀禮要義云溫本作鞠窮焉此條參用

抱經先生儀禮釋文攷證儀禮注疏詳校龍城札記三書之說

當暑袗絺綌必表而出之皇疏本無之字疏云古人

表葛之上若在家無別加衣若出行接賓皆加上衣當暑絺綌可單出則不可單必加上衣故云必表而出也元照案曲禮

下

絺綌不入公門注引

此文

亦衍之字

正義云上無衣表則因露見爲不敬又

云引論語證入公門不單也玉藻振絺綌不入公門注振讀爲袵袵禪也表裘外衣也二者形且褻皆當表之乃出正義云形且褻者形解袵絺綌其形露見褻解表裘在衣外可鄙褻二者皆上加表衣乃出也

大記袍必有表不禪注論語袵絺綌

必表而出

亦衍之字

亦爲其褻也又下節注絺綌紵者

當暑之褻衣也据此則經文不得有之字孔注之

字皇疏本亦無

丁教授云必表而出不當有之字出出門也表字該下緇衣三可

必有寢衣長一身有半孔云今之被也鄭注今小臥

被

周禮天官玉府疏引

元照案說文

衣部

被寢衣也長一身有

半周禮玉府注云燕衣服者巾絮寢衣袍釋之屬

廣雅

釋器

寢衣衾韞被也毛詩正義

召南小星

云今名曰

被古者曰衾論語謂之寢衣也寢衣爲被具有確

徵毋庸別解

鄉人飲酒杖者出斯出矣孔云鄉人飲酒之禮主於老者老者禮畢出孔子從而後出也元照案儀禮鄉飲酒禮鄭目錄云諸侯之卿大夫三年大比獻賢者能者於其君以禮賓之與之飲酒疏云凡鄉飲酒之禮其名有四案此賓賢能謂之鄉飲酒一也又案鄉飲酒義云六十者坐五十者立侍是黨正蜡祭飲酒亦謂之鄉飲酒二也州長春秋習觐於州序先行鄉飲酒亦謂之鄉飲酒三也案鄉飲酒義又有鄉大夫士獻國中賢者用鄉飲酒四也

其王制云習射尚功習鄉尚齒卽是州長黨正飲

酒

所引据盧氏注疏詳校

賈氏此疏分析極賅如孔解則此

是黨正飲酒今知不然者鄉飲酒禮記鄉朝服而

謀賓介注云鄉鄉人謂鄉大夫也又鄉飲酒義鄉

人士君子尊於房戶之間注云鄉人鄉大夫也是

鄉人乃鄉大夫之稱也夫鄉大夫飲酒尚德黨正

飲酒尚齒

亦賈疏文

孔子不敢以有德者自居故必俟

杖者出而後出若黨正飲酒尚齒固眾人所同又

何庸述乎

周信之云与儀徵少宗伯所解相同兼能補所未備

○或以鄉人

飲酒爲鄉人偶然聚飲不在四事之內者非也古
無無故聚飲之事況孔子乎

車中內顧古論有不字鄭注從古包咸所注魯論也
故無不字其注云輿中內顧者前視不過衡軛旁
視不過轡轂也漢書成帝紀贊曰升車正立不內
顧矣言不親指師古曰此三句本論語鄉黨篇
今之語云車中內顧內顧者說者以爲前視不過
衡軛旁視不過轡轂與此不同是師古所据集解
本經注竝無不字今案皇疏本經注皆有不字疏

云內猶後也顧迴頭也升在車上不迴頭後顧也
据此疏以不內顧爲說則皇本元有不字非後人
之所竄增元照綜而覈之則皇疏甚誤古論不內
顧以內顧爲回視魯論內顧則以爲外內之內薛
綜注東京賦云內顧謂不外視包氏之云正所以
釋顧之在內也前視過乎衡柅旁視過乎轡轂則
外顧矣疏說全失包意蓋漢儒說論語有古齊魯
三本異同甚夥何晏不察襍采諸家之注不辨古
魯之分經從古而注從魯者有之經從魯而注從

古者有之回互難定流傳既久遞相私改故皇顏
所据本各不同而此經則當從師古乃魯論經注
真本也皇在顏前慮有据皇以難顏者故略說之
餘詳鍾山札記

先進德行一節鄭氏以合前章

釋文

元照案自晉以前

皆以此爲聖語仲尼弟子列傳冉耕字伯牛孔子
以爲有德行又孔子以仲弓爲有德行又孔子以
爲子游習於文學新序

雜事

孔子曰言語宰我子貢

後漢書

文苑傳
鄭炎

安得孔仲尼爲在陳四科劉氏

劭

人物志序仲尼不試無所援升猶序門人以爲四

科梁書

裴子野顧協徐
摛鮑泉列傳論

阮孝緒常言仲尼論四科

始乎德行終乎文學漢書注

宣元六
王傳

引孔子曰德

行云

凡此皆以爲孔子之言蓋漢魏相承之說

如此至皇氏義疏如別爲一章以爲記者所書說

者曰字而不名非天子云

說見論
語筆解

元照案孝哉閔

子騫夫子未嘗不稱弟子之字也

人不間於其父母昆弟之言陳羣云言閔子騫爲人

上事父母下順兄弟動靜盡善故人不得有非間

之言也皇疏云凡人物論無有非間之言於子騫
父母昆弟也漢書杜鄴傳善閔子騫守禮不苟從
親所行無非理者故無可間也後漢書范升傳升
奏記王邑曰升聞子以人不間於其父母爲孝章
懷注言子騫之孝化其父母兄弟言人無非之者
論衡知實孔子曰孝哉閔子騫人不間於父母昆弟
之言虞舜大聖隱藏骨肉之過宜愈子騫瞽叟與
象使舜治廩浚井意欲殺舜當見殺已之情早諫
豫止旣無如何宜避不行若病不爲何故使父與

弟得成殺已之惡使人間俗本誤聞非父弟萬世不滅
以虞舜不豫見聖人不能先知十三也此漢儒舊
說較陳注勝之矣

非我也夫二三子也前人有及見宋淳熙九經本之
有句讀點注者以夫字上屬元照案皇疏云非是
我意也是夫二三子意也則六朝時已以夫字下
屬邢疏亦同之淳熙本乃新定句法雖非舊讀頗
較勝之

季氏富於周公孔云周公天子之宰卿士也皇疏云

周公天子臣食采於周曰爲公故謂爲周公也蓋
周公旦之後也元照案言侯國之卿富過於天子
之冢宰周公自指同時者而言非公旦也傳記未
見有述公旦之宮者

由也諺

今本作嘖

鄭注子路之行失於叛

皇本作反釋文作叛云本今作

畔

諺尙書

無逸

乃逸乃諺傳云叛諺不恭正義引論

語爲證元照案呂覽

尊師

說義不稱師命之曰叛高

誘注叛換也以之證論語莫切於此高氏以換訓
叛殆與卷阿詩伴與之義相同彼箋云自縱弛之

意縱弛則不恭矣○換義與援相近

別有詩然

畔援

皇

箋云畔援猶跋扈也韓詩傳云武彊也王

彌以叛諺爲剛猛

見皇

義亦相附

冠者五六人童子六七人皇疏引或云冠者五六人

五六三十人也童子六七人六七四十二人也四

十二就三十合爲七十二人孔門升堂者七十二

人也此說流俗相承以爲諧助一出自此疏

徐

田云養原案何晏爲清談之祖其解論語采集舊注尙爲謹嚴至皇氏所載十三家則全是王何宗旨矣時無范甯誰復迴狂瀾於既倒耶然其說非無所本漢成陽令

唐扶頌五六七化導若神五釋洪适云五六六

七者用曾點冠者童子文則其所田來遠之矣

憲問變之能勿勞乎孔云言八有所愛必欲勞來之

釋文勞力報反皇疏云變志不能不勞心元照案

詩小雅隰桑心乎憂矣遐不謂矣箋云遐遠謂勤也我

心變此君子君子雖遠在野豈能不勤思之乎宜

思之也孔子曰變之能勿勞乎此鄭箋文箋引

矣二句引忠焉皇疏所說乃鄭義非孔義也勞從

句證下二句本讀○集註云變而勿勞禽犢之也也用禮記子

婦有勤勞之事雖甚憂之姑縱之而甯數休之之
義雖從本讀義與鄭異此章忠憂似不屬父子君
臣而言且憂則言父之於子忠則言臣之於君語
意似不倫

陽貨篇孺悲欲見孔子一節據檀弓下哀公嘗使孺

悲學士器禮於孔子固孔氏之門人也孔子不見

孺悲賈公彥

儀禮士相見禮疏

謂孺悲不由介紹之故然

經文有將命者非介紹而何賈說似未覈也皇疏
云孺悲使人召孔子欲與孔子相見孔子不欲應

故辭元照案此說至當試以此經書法之陽貨
召孔子書曰欲見孔子與此書法相同若就見者
則當書請見如儀封人之例矣賈氏誤謂孺悲就
見故從而強爲之說邢疏亦云來欲見孔子孔子
不欲見之孔子於互鄉童子未嘗之何獨拒孺
悲之淡耶何晏注云所以使將命聞使孺悲思也
明乎孺悲之未嘗聞也愚謂於孔子之後自不
敢來召其師疑此事在奉命學禮之時故挾君命
而自倨聞悲悔悟卒來就學士器禮於是得傳於

世始雖獲罪終列門牆孺悲之在弟子之列無可

疑者朱氏

彝尊

有孺悲從祀議其說至公惜未能

行也

惡居下流而訕上者漢石經無流字一切經音義兩

引亦無

十三經又十六大愛道比邱尼經下

是貞觀以前本皆同

皇疏本有流字者係後人誤增元照案皇疏云惡

爲人臣下而毀謗其君上者下上以位言不以品

言爲人臣下不得言居下流也又案子張篇紂之

不善章疏云下流謂爲惡行而處人下者也若陽

貨篇有流字則曷不疏於前而反疏於後乎惠氏

古義云鹽鐵論

地廣

云文學居下而訕上漢書

朱雲傳

小臣居下訕上皆用論語文

梁曜北云報任少卿書下流多誦議亦言

其賤耳鹽鐵論朱雲傳或省文引之未可為無流

字之確徵元照案楊惲報孫會宗書亦云下流

之人眾毀所歸此与

史公皆用子張篇文

隱居放言包氏云放置也不復言世務也元照案放

廢也廢置也

爾雅釋詁廢舍也古廢置互通

厥義相因伊尹放大

甲於桐放亦置也非弃逐之謂

此說別有辨

介之推曰

言身之文也身將隱焉用文之中庸曰其默足以

容卽隱居放言之義

困學紀聞說

集註云放言自廢則

似二人託跡隱淪狂言無忌近於孟子所謂處士

橫議者豈聖人之所許乎當以舊說爲長

徐新田云養原

案馬融解無可無不可云亦不必進亦不必退惟義所在言簡義精前人未經拈出此章論逸民則可不可祇當就出處言

堯曰雖有周親不如仁人孔云親而不賢不忠則誅

之管蔡是也仁人謂箕子微子來則用之元照案

呂覽

離謂

夫傷忠臣者無功不得民者則以其無功

不得民傷之有功得民者則又以其有功得民傷

之比于萇宏以此夾箕子商容以此窮周公召公
以此疑范蠡子胥以此流高誘於周召句注云以
管蔡流言故疑也論語曰雖有周親不如仁人此
之謂也高氏引此以見管蔡周親不如周召仁人
意與孔注大致相同新校本云此引論語不解所
用意此殆習平古文孔傳之說而未之思也

孔子之門父子同學者顏曾而外他無間焉冉耕冉

雍二人家語以爲宗族元照案論衡

自紀

云鯀惡禹

聖叟頑舜神伯牛寢疾仲弓潔全顏路庸固回傑

絕倫以仲弓爲伯牛之子存之以廣異聞可也

漢儒經師家法建安卷亂之後漸失其傳如何晏於經學本無所得其撰論語集解兼采眾說不欲墨守一師之言兩漢專門名家之學自茲遂破且漢時論語魯古並行諸家授受本各不同若於一章之內文字訓解專主一家猶之可也今其書雜陳眾說一章而載三四家說以致前後衡決不相檢照者甚多如未若貧而樂道鄭本無道字故其注曰樂謂志於道孔本有道字故其注兩言樂道兩

注竝存而經文道字之有無遂莫能定矣子在齊
聞韶三月不知肉味周生烈曰聞習韶樂之盛美
故忽於肉味也如周解則不圖爲樂之至於斯乃
歎美之辭非別有所指也何氏於下文又載王肅
曰不圖作韶樂至於此此此齊也於是郭象江熙
范甯皆以爲夫子傷慨之辭雖不知於經之指歸
何若而周王兩說固已不可合矣下章古之賢人
也鄭從古作賢仁故其注云孔子以伯夷叔齊賢
且仁集解於經文既定作賢人又載鄭氏賢且仁

之語不反成弔詭乎如斯之類尙難枚舉姑記所疑以諗同學

論語爾雅之疏皆宋邢昺撰孝經疏乃唐元行冲奉

明皇詔而作者見唐書元行冲傳舊唐書經籍志

孝經疏三卷元行冲撰宋咸平三年邢昺奉詔取

元疏約而修之故昺序有翦截元疏之語後人遂

以疏爲邢書誤也

孫監察云志祖案今注疏不但題邢昺校則非邢撰可知也

臧在東云鏞堂謂論語本之皇侃爾雅疏本之孫次高連孝經疏本之元行冲皆非邢氏翔作邢皆改名正義而不云疏徐新田云養原案邢氏三疏唯孝經差勝蓋全用元疏故也論語雖本皇侃

其改易者多矣爾雅舊疏不傳無由考其沿革孫
高六朝小儒原本諒亦不佳邢氏据之宜其劣也
○邢昺序寥寥數語不似序體又有一序題成都
府學主鄉貢傳注奉右撰亦不知何人

葉紹翁四朝聞見錄

丙集

云真文忠公名德秀字景元

樓宣獻公叩之以字義真荅以慕元德秀之爲人
故曰景元樓公取詩注景行行止處示之則景之
義爲明謂高山仰止對明行行止也真遽易爲希
元蓋景元乃明元無謂也元照案唐明皇孝經序
云朕嘗三復斯言景行前哲元行冲疏亦云景明

也孫奕示兒編六云或者不審景行之音訓徃徃

泥此一句倡爲景慕之說博攷經傳景之爲言大

也明也景慕二字徃徃因孝經序而言之近世尺

牘中間有用之者殊未聞有以景之一字訓慕也

抱經先生云履齋之說非也後漢書劉愷傳賈逵

上書稱愷景仰前修章懷注引景行行止而云景

猶慕也又陳宮上書稱愷百僚景式注云景慕以

爲法式則景有慕仰之意自漢已然矣元照又攷

漢陳度碑亦有景仰之文

見隸續十九其上下文皆闕

王簡栖

頭陀寺碑以法師景行大迦葉故以頭陀爲稱首
顏氏家訓慕賢篇安可不攀附景仰之乎晉書杜
夷傳景仰軌則魏書任城王雲傳普天景仰皆在
孝經序前

梁惠王上篇是罔民也孫氏音義云張如字丁作司
民又滕文公上篇音義云罔民張云或作司誤也
元照案司古伺字漢書凡伺察字皆作司鄭注周
禮蜡氏秋官序官云蜡讀如狙司之狙釋文司字無音漏也司反
司民猶言爲阱於國中若狙司然也與罔民義同

不可謂誤

徐新田云養原案說文無伺字人部伏字注云司也臣鉉等曰司令人作伺

閻氏

若璩

解今之樂由古之樂爲歡樂之樂引左傳

古而無死則古之樂也爲證元照案孟子因齊宣

云好世俗之樂故解之曰今樂猶古樂若讀如洛

則失語意矣閻說非也下文臣請爲王言樂則當

音洛邠卿云孟子欲爲王陳獨樂與眾人樂之狀

明不從本讀孫氏音義朱子集註於此皆不加音

漏耳

徐新田云養原案百詩此說有二條一在釋地三續此所引是也一在初續明言通章樂

字除鼓樂外皆當音落九能豈未見邪唐風云好樂無荒此好樂二字所本坊記云貧而好樂元

照案邠卿云世俗之樂謂鄭聲也則
好樂今樂古樂等字皆當從本讀

梁惠王下篇明明胥讒邠卿云明明側目相視音義
云字亦作謂元照案說文目部明視兒玉篇明字
引此文爲證唐李華弔古戰場文明明心目亦用
此文也字書言部無謂字且从言与視義無涉○
墨子經上云謂作嘽也有此一見亦不可解墨子書
古無善本而經說數篇尤傳譌難讀謂字之正否
不可知

反其旄倪邠卿云弱小繫

從孔刻本。音義云繫鳥
分切爲此字作音也監本

毛本作倪與下倪者也元照案說文女部嫫嫫也嫫

嫫字作重文非嫫者也廣雅釋親鄭注禮記雜記下云嬰猶鷺彌也

釋名長幼云人始生曰嬰兒或曰嫫嫫是也言是

人也嫫其哢聲也故因以名之也繫倪即嫫嫫之

異文鄭作鷺彌聲轉字異丁公著云旌倪老也音義

引非是臧在東云旌為老

殷時有兩微仲一為啟弟一為啟子呂覽常務云紂之

同母三人其長曰微子啟其次曰中衍史記宋屯

家微子開卒立其弟衍是為微仲家語本云其弟

曰仲思名衍漢書古今人表一在中上一在中中
班氏自注云啟子注之者所以別於仲衍也是在
中上者之爲啟弟明矣閻氏若璩以孟子所云微
仲爲啟子而非啟弟援人表爲證殆未攷人表有
兩微仲邪。檀弓上微子舍其孫脂而立衍也證
以呂覽史漢衍爲微子之弟明甚北齊書儒林刁柔
傳引作微子舍其孫脂而立弟衍許周生云此文參用鄭注
義更顯蘇氏古史云微子卒垂子蚤歿乃立垂子
之弟微仲衍自注云垂以爲微子之弟失之臧在東云

此即駁鄭注微子之子名衍未知見於何書恐未可以

臆說廢相傳之舊解也許周生云此正是舊解

本於檀弓讀檀弓本文自明康成亦以衍為微子

適子之弟古史即從鄭注稍增益數字並非紉解

惜正義脫去此句之疏故讀者忽之耳元照案

注云微子適子微子之弟名衍而其子又名衍是

子之適子也微子之弟名衍而其子又名衍是

子與叔父同名恐無此理然案刀柔傳柔引檀弓

經注而中之云然則商以嫡子為立嫡子之母弟

此句正指微子立衍之義是刀氏之讀鄭注亦同

周生之說矣臧在東云鏞堂案九能据呂覽史

漢以駁正古史與檀弓本文合檀弓云文王舍伯

邑考而立武王微子舍其孫脂而立衍二文互舉

猶言文王舍其孫而武王微子舍其嫡子而立武王也舍伯邑考謂伯邑考為伯邑考之弟猶微仲為微子之弟

也

滕文公上篇是率天下而路也音義云丁張竝云路

與露同元照案左傳

昭元年

勿使有所壅閉湫底以

露其體杜預曰露羸也韓非子

上

好罷露百姓風

俗通義

怪神

大用羸露又通作潞呂覽

不

士民罷潞

高誘注潞羸也

方言三廣雅釋詁三皆云露敗也

又管子

四

不知

四時之故天下乃路此与孟子義尤合

段先生云詩串夷載

路箋云路瘠也侵伐混夷以瘠之凡作應者非也此与趙注相發明

○邪卿云是率

天下之人以羸困之路也故曰是率天下而路也

案音義本標羸路二字蓋邵武士人不解羸路之

義故增益困之二字而不顧文義之難通

段先生云九能

此說極好

且果云羸困之路則丁張所云路與露同之

語反成弔詭矣困之二字當依音義芟去又音義

云羸力爲切字亦作羸卽果切案羸羸義異羸誤

無疑

王氏

柏

書疑詩疑二書於經文增芟改竄前人非其

師心自是固矣其書疑中以堯

改作帝

曰咨廿四字

補入舜讓于德弗嗣之下猶之可也又於敬敷五

教在寬之下以孟子勞之來之廿二字驛入斯甚

誤矣元照案孟子放勳曰勞之來之

云

乃是日

月之日邠卿云遭水災恐其小民放僻邪侈故勞
來之匡正直其曲心使自得其本善性然後又復
從而振其羸窮加德惠也則此廿二字者乃孟子
言放勳之行事非述放勳之言也音義云丁音駟
或作曰誤路史紀陶唐云拏契司徒教以人倫于日
勞之徠之匡之直之輔之翼之亦用此文也王氏
專据集註遂不復深究毛晃增韵又据集註而以

日字爲誤宋元人之墨守如此。○孟子疏亦作曰
字解疏卽託名孫氏而於孫氏之音義略不寓目
可陋也。許周生云武進臧玉林經義襍記有一條
与此略同周信之云王氏本集注卽使
攷其音義亦斷不肖從也徐新田云養原案勞
來等五句固非放勳之言要亦是百二十篇中語
非孟子臆撰也特不
宜繫在寬之下耳

滕文公下篇泇水者洪水也邠卿云水逆行泇洞無

涯故曰泇水元照案凡从夆之字古讀皆若洪說

文

木部

夆从木夆聲讀若鴻又降字自漢以前無讀

去聲者

詳顧氏
音論

夆鴻一聲之轉孟子以洪訓泇亦

係同聲取義澤洞亦疊韵澤与虹亦通七發虹洞

兮蒼天玉篇云澤漬也澤漬釋言文今爾雅作虹

顧野王本作訂李巡本作降見釋文此數字音義悉

同張鑑音澤爲絳非也絳古音亦如洪然張氏則不如此丁公著

又以澤洞之澤當从夆夆音逢澤洪水也元照案

說文大徐本無澤字繫傳有之云大水也此繫傳

之誤繫傳火部有炙字復有炙字澤別爲澤猶炙別爲炙也玉篇廣韵皆無

澤字又案說文澤字注云水不遵道一曰下也邠

卿所云逆行卽不遵道也澤水之澤本从夆乃改而从夆逢蒙之逢本从

斧乃改而從斧唐人不明小學舛錯如此

離婁上篇天之方蹶無然泄泄泄泄猶沓沓也

子咄咄猶沓沓也元照案說文口部引詩作咄咄言部引

作詵詵皆訓多言又口部沓語多沓沓也

言部詵也泄泄沓沓多言之義今詩與孟子作泄者古文通借

耳又荀子蔽解辯利非以言是則謂之詵楊倞注云

辯說利口而飾非以言亂是則謂之詵亦引詩證

之又正名愚人之言諛諛然而沸楊注云諛諛多言

也孟子釋沓沓之義云言則非先王之道亦指言

而言之又案詩

小雅十

嘽沓背憎傳云嘽猶嘽嘽

沓猶嘽嘽箋云嘽嘽沓沓相對談語

晉書忠義王豹傳引詩作

嘽嘽山井鼎毛詩攷文云經注沓字古本皆作嘽

又大雅蕩箋有笑語沓

沓之文義可互證

錢先生云鄙製荅問有一條与此略同

存乎人者莫良於眸子邠卿云存人存在人之善惡

疏不能釋存在之義元照案爾雅

釋詁

徂在存也在

存省士察也邠卿本此義存人卽觀人之謂故章

指云存而察之善惡不隱

胷中不正則眸子眊焉盡心上篇第卅六章章指云

宵中正者眸子不眚眚文異音義不爲之辨元
照案說文眚目少精也眚但目謹視也以義攷之
則眚爲正文假借用眚周書眚眚眚之即詩小
角如鬢如髦之髦也鄘風髦彼兩髦說文引作鬣
爾雅釋木旄冬桃說文作𦏧讀若髦又旄邱見於毛
詩爾雅者皆从𦏧毛聲而字林作𦏧又作𦏧与眚
眚同例毛攷聲相近

離婁下篇逢蒙音義云丁張竝薄江切從夆夆下江
切元照案說文𦏧部無逢字玉篇亦無

玉篇并無
逢字係譌

脫逢蒙當从夆淮南道應訓作逢亦曰逢門子見漢書王褒傳古今人表亦曰逢須

見鹽鐵論能言篇逢有符容蒲蒙敷容薄江四音皆逢聲

也攷莊子山作蓬蒙釋文云符恭荀子王霸呂覽反徐扶公反

聽史記傳龜策作蠡門呂覽具又作蠡蒙荀子注云蠡音逢

觀蓬蠡之通用則逢字之不从夆明矣漢書古今

人表於逢公柏陵逢丑父楚逢伯逢於何陳逢滑

逢大夫及逢門子皆壹从夆匡繆正俗八云逢姓

蓋出於逢蒙讀當如其本字更無別音今之為此

音者自稱乃與龐同音猥云逢姓之逢與逢遇字

別妄爲釋訓何所據乎小顏雖不知逢有四音然其斥分別者爲無據其說誠是而廣韵四江部有逢字與龐同紐注云姓也出北海左傳齊有逢丑父今攷逢丑父見左氏公羊成二年傳二傳釋文皆無音又攷左傳釋文於逢伯僖六年逢大夫宣十二年逢伯陵昭廿一年逢滑哀元年皆無音是逢姓与逢遇之逢唐以前無分爲二字者唯國語舊音於逢伯陵

周語下

音白

薄白同並母

江反亦未嘗論及字體蓋逢別

爲逢始於廣韵而唐人未能盡信後人誤遵用之

耳唐人多昧古音其意以从夆不合於薄江切故改而从夆猶泝水之泝本从夆以不合於胡貢切必改而从夆

有辯見前

雖相反而正相同皆不識古音

不信說文之故也隸釋十逢盛碑陰跋亦曾辯之

云石刻有漢故博士趙傳逢府君碑神道逢童之碑其篆文皆从夆魏元丕碑有逢牧孔宙碑陰有逢祈此有逢信亦不書作逢予謂漢儒尙借逢爲逢則恐諸逢當讀爲鼉鼓逢逢之逢爾洪氏此說最精瞻顧氏唐韻正之論亦同郭氏

忠恕

佩觿辯

證李氏

文仲

字鑑皆謂从彖者非姓攷之不審矣

仁和梁曜北古今人表攷
證引甚備此條頗參用之

書云祇載見瞽瞍夔夔齊栗瞽瞍亦允

句

若是

句

爲

父不得而子也古文尙書采此文入大禹謨云瞽

亦允若傳云父亦信順之蓋訓若爲順也元照案

邠卿云瞽亦信知舜之大孝若是爲父不得而子

也是孟子本於允字絕句若字屬是字爲句撰古

文者故別於趙注以示異猶論語引書施於有政

是亦爲政

据包咸注以二語書元照以二語爲孔
子語有說辨之然与古文尙書均不相

合而古文中分之改爲克施有政以次語屬之孔子蓋既托於孔壁古文原不必規規於漢儒不見古文者之說也而其裁綴之工又誠足以動人觀聽古義晦昧尠有究心論古文者如閭惠諸君未嘗及此也

徐新田云養原案孟子所載舜事趙臺卿以爲俱在舜典中堯典篇末已及舜

終則堯典乃夏史所作稱舜父爲瞽瞍乃史官敘事之辭瞽乃無目之名或謂舜父有目其心不明故謂之瞽則瞽者罵之之辭也若如今書禹謨帝舜方爲天子乃呼天子之父爲瞽有是理乎

江氏

聲

尚書人注采集逸文仍連若字孫氏

星衍

所輯古文馬鄭注其所采不誤

履齋示兒編 云書所載伊尹放大甲于桐放當作

教以其篆文相近故譌耳宋氏濂極偉此論元照

案此當以孟子證之公孫丑問曰賢者之爲人臣

也其君不賢則固可放與孟子曰有伊尹之志則

可無伊尹之志則篡也觀乎此則放字之非誤明

矣孫監察云伊尹放大甲不惟見孟子也亦見左

襄廿一年傳外傳晉語示兒編之說頗謬潛溪誤信之予向於示

兒編跋中有辯客或難曰此固公孫丑之言也

若萬章上篇伊尹放之於桐三年則孟子之言也

孟子於舜之放象尙爲之辯而顧謂伊尹放大甲

何也元照謂古人語意輕重不嫌同辭一字而兼
兩義者其義必相近就其相近之中則必有重輕
在後人較量謹言古人則不若是也卽以放字論
之放驩兜于崇山晉放其大夫胥甲父則當訓弃
小爾雅訓逐說文湯放桀伊尹放大甲則當訓置
廣言包咸注廣雅釋詁四伊尹安置大甲於先王陵寢之旁夫豈
弃逐之哉又何煩穿鑿耶

主司城貞子爲陳侯周臣邠卿云陳侯周陳懷公子
也爲楚所滅故無諡但曰陳侯周元照案懷公子

爲潛公見史記陳世家漢書五行志 其名周僅
見於孟子師古五行志注云閔公名周卽祖孟子
也史記則以爲名越當別有所据索隱云案左傳
潛公名周是史官記不同也元照攷左傳無潛公
之名亦無諡不知索隱何据臧在東云索隱言有誤耳。身歿
國亡而猶有諡者如欒懷子是也陳侯諡潛亦與
相類

告子下篇方寸之木可使高於岑樓邠卿云岑樓山
之銳嶺者元照案爾雅釋山山小而高岑故曰銳左

傳襄廿四年部樓

說文作附婁今本亦作婁釋文云本亦作樓

無松柏應劭

云言其卑小

風俗通義十

杜預云部樓小阜岑樓部樓

文義相類大小皆可名樓也

由鄒之任見季子由平陸之齊不見儲子邠卿云孟

子荅此二人有異

又云俱荅二人又云故荅而不見

元照案禮無

不荅儲子既以幣交雖禮意不誠當往荅之如陽

貨歸孔子蒸豚孔子必往拜此禮之不可失者也

但不欲見其人故闕亾而往孟子之荅儲子當亦

類此若受其幣而不荅則非禮矣趙氏推測至有

精義如檀弓說季札葬子孔子往而觀葬康成注云徃弔之此亦由推測而得之者漢儒之精審若是

詆訑音義云張吐禾切云蓋言辭不正欺罔於人自誇大之貌丁云此字音他又達可切說文云欺也字作詆不音怡詆訑自足其智不耆善言之貌今諸本皆作詆卽不合注意當借讀爲詆音怡元照案詆訑二字音義悉殊詆隸變作它訑隸變作也後來它也二形溷而爲一如訖訖等字本皆从它

而俗書則皆从也訛字爲詆亦此之類故廣韵

支四

以詆字爲俗體至𠂔字乃俗書之尤無理者不必

論矣

徐新田云養原案俗書𠂔字又因施字而誤初不知施乃从𠂔从也非从方从𠂔耳

公著所別詆詆二字實卽一字皆俗書也

玉篇云詆湯何

切又達可切詆謾而不疑兗州人謂欺曰詆俗作詆又云詆式支切詆詆自得也別詆詆爲二不知

正俗之分

正體當從說文作詆凡一字有數義者說文

每不詳備不必因与趙注不符而致疑於字體也

莊子

知北遊

僻陋慢詆与孟子義合楚詞

九章惜或

詆謾而不疑王叔師訓爲詐欺釋文云詆一作詆

可證訑訑無別張鑑之說已知訑訑爲一其解亦

較勝邠卿。又案訑當讀徒和反訑史記龜策列傳或

忠信而不如誕謾徐廣云誕一作訑元照案誕訑

聲相近

徐新田云凡它也之淵不可枚舉然莫誤於沱字蓋沱潛之沱借作沱沼之沱本屬

一字今以从它爲沱潛从也者爲池沼判一爲二繆不可言又案它也二字字異音同韵書於从它之字多入歌韵从也之字入支韵非唯昧於字體兼不知音矣

王文成以致良知三字提唱宗旨與朱子爲難良知

二字肇自孟子文成之解良知實本於朱子邠卿

則訓良爲甚元照案後漢書馬援傳良怖急者可

牀下伏章懷注良甚也又古人良久良苦之云皆甚之謂也上篇良貴亦當訓甚集註皆訓爲本然之善文成遂得借以行其說矣

柳下惠不以三公易其介邠卿云介大也

釋詁文

柳下

惠執宏大之志不恥污君不以三公榮位易其大量也音義引陸善經云介謂特立之行元照案孟子言柳下惠雖袒裼裸程於其側而由由然與之偕故譏其不恭則與介特之義不相似必若伯夷之隘乃可謂之介特言固各有攸當也劉氏

劭人

物志別體

云宏晉之人意愛周洽不戒其交之溷糺

而以介爲狷廣其濁是故可以撫眾難與厲俗狷
介之人矻清激濁不戒其道之隘狹而以晉爲穢
蓋其拘是故可以守節難以變通其所謂介者指
伯夷一流所謂晉者指柳下一流繹劉氏之論則
知鄒卿之允

人莫大焉也親戚君臣上下元照案近讀於焉字絕

句非也焉當訓於何邵公解公羊云焉爾猶於是

也

隱二年

又云焉者於也

宣六年

高誘淮南注焉猶於

則時与此字法一例當作一句讀

古書敘述言辭有兩人之言總蒙一曰字者有一人

之言重一曰字者孟子自范之齊章內孟子曰三

字是重文起義亦猶禮記

哀公問

孔子遂言曰之例

也趙氏章句分爲兩章

別有章指故知分爲兩章

集注合爲一

章而以孟子曰三字爲義文恐皆非是

盡心下篇王曰無畏寧爾也非敵百姓也若崩句厥

角稽首邠卿云百姓歸周若崩句

厥角

讀

頤角犀

厥

文選注四十地句

稽首

讀

拜命

句

亦以首至地

也章指云殷民厥角周師歌舞

淮南本經訓劄劄

詩蹶角之蹶詩無蹶角之文

元照案邠卿訓厥爲

犀厥非剗解也

段先生云王裁案額角犀三字連讀國語角犀豐盈注亦可證中山

策亦云眉目權衡角犀偃月然則

漢書諸侯王表

角犀卽今相書伏犀貫頂是也

犀字

首奉上璽轂正用孟子此文應劭曰

厥者頓也角者額角也晉灼曰厥者豎也叩頭則

額角豎兩說小異

應氏訓頓與趙尤合

要皆不以厥爲語助

漢人行文連用經典語助如色斯友

于刑于之類頗有之厥角非其類也

云歸周若崩猶云從惡如崩極言其易耳撰古文

尙書者不審此義芟竄孟子之文入之泰誓曰百姓懍懍若崩厥角其傳云民畏紂之虐色懼不安若崩摧其角無所容頭始以若崩厥角爲句旣以崩角連文不得不訓厥爲其句讀故訓胥失之矣趙注文義晦澀古文尙書盛行遂末有爲之申明者○王融曲水詩序屈郛厥角請受纓縻陸倕石闕銘屈郛交臂厥角稽顙邛遲與陳伯之書夜郎滇池解辯請職朝鮮昌海蹶角受化

以厥爲蹶合於晉灼之訓

以厥角與屈郛解辯爲對偶尙不失古義古文尙

書王陸諸人已及見矣而不遵用者特以沿襲漢書之故耳

被袵衣邠卿云袵畫也梁先生

同書

云袵之訓畫於

古無徵案三國志魏文帝紀往引文帝令曰昔者大舜飯糗茹草將終身焉斯則孤之前志也及至承堯禪被珍裘妻二女若固有之斯則順天命也

是漢時本有作珍裘者翟氏

灝

攷異失采

錢先生云大昕

案梁說甚確

許周生云

宗彥案言舜者多及於

琴蓋以舜有南風之操也南風爲夏時被袵衣鼓

琴一時事耳作珍裘者蓋儒家相傳別本

梁曜

北云然則舜鼓琴只有南風一操如范履霜耶

徐新田云養原案夏小正合冰必於南風解冰必於南風師曠歌南風在十二月樂記舜作五弦之琴以歌南風疏云世本神農作琴舜用此琴特歌南風亦不必以范履霜為嫌臧在東云鏞堂案周禮司裘仲秋獻良裘鄭仲師云良裘王所服也虞之珍裘猶周之良裘貴為天子始服之山舟先生說是

以追蠡邠卿云蠡蠡欲絕之貌也元照案荀子賦蠡

兮其相逐而返也楊倞注蠡與蠡同蠡兮分判貌

蠡音戾方言六參蠡分也齊曰參楚曰蠡秦晉曰

離又三蠡解也又案說文部蠡蟲齧木中也蓋木

以蟲齧有欲斲之狀皆可互參周信之云程氏通藝錄解蠡字最當